

Kada smo nakon optimističnih najava iz Elektroprivrede BiH pomislili da je konačno kraj višegodišnjoj trakavici u vezi sa izgradnjom bloka 7 u Tuzli i da realizacija te najveće poslijeratne investicije u energetsom sektoru u BiH treba da počne, politika ponovo sve vraća na početak. Traži se revizija revidiranog projekta. Novo gubljenje vremena koje bi najviše moglo pogoditi rudare.

Pripreme za izgradnju bloka 7 trajale su predugo, punih pet godina. No, budući da je opstojnost rudnika Kreka - koji treba plasirati ugalj tome bloku - dovedena u pitanje, menadžment Elektroprivrede BiH je ubrzao pripreme sve kako bi se spasilo nekoliko hiljada radnih mjesta u rudnicima i energetsom sektoru.

“Očekujemo, kako su kineski partneri iskazali želju, da će ugovor o kreditu biti potpisan u novembru”, najavljuvao je direktor EPBiH Bajazit Jašarević.

Od toga, najvjerovatnije, nema ništa. Politika je, po ko zna koji put, uplela svoje prste. Sve opet mora ići na reviziju jer vlast smatra da je cijena bloka previsoka. Predsjednik SBB-a BiH Fahrudin Radončić nakon sastanka s liderima SDA i HDZ-a BiH izjavio je da će tražiti od Nadzornog odbora EPBiH da preispita ugovor. Sličnog je razmišljanja nakon sastanka bio i Bakir Izetbegović, predsjednik SDA: “Ne znam dovoljno o tome, ali sa svih strana stižu već odavno procjene da bi to moglo biti jeftinije. Treba se sve preispitati i ako je moguće jeftinije raditi”, rekao je on.

Radončić zaboravlja da je SDA, koja je njegov koalicioni partner, i ranije vodila taj projekt, zajedno sa SDP-om. Međutim, struka demantuje politiku i tvrdi da je blok 7, čija je vrijednost 722 miliona eura, najjeftiniji u regiji. Jeftiniji je od kineskih investicija u Doboju i Banovićima.

Potvrđuje to i bivši vođa projekta izgradnje bloka 7 u TE Tuzla Jusuf Merić: “Blok je 1,74 miliona eura po instalisanom megavatu, a Stanari su 1,83 miliona eura po megavatu. Znači, jeftiniji je od Stanara.”

Za razliku od Stanara i Banovića, kompletna oprema i tehnologija u bloku 7 je evropska. “Za EPBiH je vrlo važno da je to zamjenski blok i pouzdanost opreme u bloku 7 je važan kriterij za izgradnju bloka. Kod Banovića se radi o komercijalnom bloku u kome pouzdanost rada bloka nije na takav način osjetljiva kako bi to bilo u EP”, kazao je Jašarević.

izvor: indikator.ba